

# INUIT ATAQATIGIIT

## Inatsisartuni



UPA2019/135

10.04.19./Peter Olsen

**Nunatta avataanut sioqqanik nioqquteqarsinnaalernissaq pillugu Naalakkersuisut UPA2020mut iliuusissatut pilersaarummik saqqummiusseqqullugit peqqunneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Aqqaluk Heilmann, Atassut)

Siullermik Aqqaluk Heilmannip siunnersutaanut pissanganartumut soqutiginartumullu qujanarujussuaq.

Nunatsinni inuussutissarsiutini pingaarnersaq tassaajuarsinnarpoq Aalisarneq. Kisianni aamma politikkikkut suliaqartuusugut tamatta nalunngilarput, inuussutissarsiuummik ataasiinnarmik isumalluuteqartuulluni ingerlatsineq siunissaq ungasinnerusoq isigalugu pitsasuunngitsoq.

Taamaattumik politikkimik suliaqartuusugut tamatta soqutiginnguatsiarunaqaarput, nunatta aalisarneriinnarmik isumalluuteqarani, inuussutissarsiutinilli aamma allanik nutaanik isumalluute-qalersimalluni siunissami ingerlalersimanissaa soqutigisatta anguniakkattalu ilagilluinnarpaat;

Politikkikkut ingerlataqartuusugut tamatta nunatsinni inuussutissarsiutinik nutaanik nassaartoqarnissaa, pilersitsisoqarnissaa pingaarteqaarput angorusoqaarpullu.

Nunatsinni aalisarnerup saniatigut, inuussutissarsiutitut nutaatut pilersinneqarsinnaasut ilaat tassaapput; aatsitassarsiorneq, aatsitassarsiorneq erlinnartunik pinnersaasiorneq, takornariaqarnerlu.

Takornariaqarneq arriitsumik qaffakkiartuarusaarpoq, taassumalu saniatigut aatsitassarsiorneq ukiuni kingullerni nalorninartorsiortitseriarluni soorluuna piffissami kingullermi aatsaat taama isumalluarnatigisumik alloriaqqittoqartalersoq.

Aappaluttumi Rubinisorfik qiviaannarsinnaavarput; rubinisorfik aallartilluaruttulerpoq. Annikitsumik aatsitassarsiorniarlutik qinnuteqartartut aatsaat taamak amerlatigilersimapput. Kangerlussuup eqqaani Anorthosit piaarneqaleruttorpoq. Moriusap eqqaani Titaniumimik isumalluarfigineqartumik nassaartoqarpoq. Aamma nalunngilarput Maniitsup eqqaani isumalluarnartumik Nickelimik ujarlertoqartoq, minnerungitsumillu avannaarsuani citronenfjord-mi Zinkimik aamma ujarlertoqar-lunilu misissuisoqartoq.

Naatsumik oqaatigissagaanni; aatsitassarsiorneq tungaatigut nunarput ajunngitsumik siunissaqanguatsiarpassiivippoq.

Taava Aqqaluk Heilmann Atassut, sioqqanik tunisassiulersinnaaneq pillugu Naalakkersuisut periusissioqquneqarnissaannik siunnersuuteqarpoq. Assorsuaq nuannerpoq soqutinarlunilu taamatut Aqqaluk Heilmann siunnersuuteqarmat.

Immaqa nunarsuatta sinnerani tupinnaranilu nutaarsiassaanngikkaluartoq, taamaattoq isumaqarpunga kukkuallaassananga oqassaguma, maani nunatsinni sioqqanik tunisassiulersinnaaneq tupinnalaarlunilu nutaarsiassaangaatsiartoq.

Meeraanerput tamangajassuat, sioqqat akornanni pinnguarlatalu arsaattarnikuulluta, kina aamma isumaliorpa, inuunerup ilaa paasillugu tusaassallugulu; sioqqanngooq aamma inuussutissarsiutaalersinnaapput. Sioqqat inuussutissarsiutaalersinnaasut?

Ilaa taamaakkamik ajornaqaat, sioqqanngooq inuussutissarsiutigineqarsinnaarput.

Sioqqanik tunisassiorneq; Eqqarsaat pilersaarullu nunatsinni nutaarsiassaalluinnarpoq aamma soqutiginarluinnarpoq.

Eqqarsaat siunertarlu tamanna uanga aatsaat tusarpara Sermitsiaq AG aqqutigalugu. Sermitsiaq AG-mi 15.februar 2019-mi saqqummersumi ilaatigut ima qulequtalik atuarneqarsinnaavoq;

“Kalaallit Nunaannit sioqqat avammut niuerutitut”. Tassanngalu aallaaserinnittuupput qallunaat ilisimatuut marluk, tassaasut Mette Bendixen aamma Lars Lønsmann. Kalaaleqater-put ilisimatoog Minik Rosing peqatigalugu atuagassiami Nature Substainabilitymi tamanna pillugu allaaserinnissimallutik.

Kalaallit Nunaanni sioqqanik avammut niuernissamut periarfissanik assigiinngitsunik misissuinertik atuagassiamut tassunga allaaserisimavaat.

Naatsumik oqaatigissagaanni unnia; sermersuup aakkiartornera ilutigalugu sioqqat avammut niuerutigineqarsinnaasut saqqummeraluttuinnartut. Unnialu nunarsuarmi sioraq pitsaasoq amigaataaleriartoq, uagullu nunatsinni sioraaterput avammut niuerutigissallugu piukkunnaateqarlu-innartusoq. Unnia sioqqat 14 mia.kr.missaanik nalileqartut nunatsinnut ukiut tamaasa tikisineqartartut. Unnia Saharami sioqqat pitsasuuunngitsut atorsinnaanngitsullu. Unnia uagut sioraatigut betonimut, igalaaminermut, asfaltiliornermut, qarasaasiat chipsitaanut, kigutit qaqorsaataannut, iviangiusanut, viinniliornermilu aamma akorineqarluarsinnaasut.

Unnialu ilisimatuut taakku misissiuunertik ingerlappaluppaat, unnialu aamma ilisimatuunik nunatsin-neersunik suleqatissaminnik ujaaserpaluttut.

Naggataatigut minnerunngitsumilli; Nunatta pisuussutaanik sunilluunniit atuiniarnitsinni, immitsinnut aallaavigaluta ingerlatsisoqarnissaa Inuit Ataqatigiinniit pingaaartikkatigu ataatigut issusuumik naqissuserlugu oqaatigissavarput. Imatut paasillugu; Qaqugu pinerpa siunissami sioqqanik avammut tunissassiertoqalissagaluarpat, Inuit Ataqatigiinniit kissaatigeqaarput uagut nunaqavissusuusugut nammineerluta sioqqanik avammut tunisassiulersinnaaneq akisussaaffigalugu tigummiarumaaripput, imaanngitsoq suliffeqarfissuit nunatta avataaneersut aasiit kisimik tamanna akisussaaffigalugulu tigummiarumaaraat. Suliniutitut angisoorsuارت pinngikkaluarlugu, immaqa suliniutitut minnertut isigalugu ingerlanneqarumaartoq; Storskala pinnagu Småskala eqqarsaatigalugu.

Taamaattumik; Aqqaluk Heilmannip siunnersuutaa taperserlugu Sanaartornermut Nukissiuteqarner-mullu ataatsimiititaliamut suliassanngorlugu ingerlateqqinnejarnissaa innersuullugu akueraarput.

Qujanaq

Peter Olsen

Inuit Ataqatigiit